

AKASHVANI AIZAWL

REGIONAL NEWS BULLETIN

Sunday, April 27, 2025 Time - 2:30pm - 2:35pm

CRC, MP

Chin Refugee Community (CRC) a hnam hrang hrang aiawh mi 12 te chuan Lok Sabha MP Pu Richad Vanlalmangaiha chu New Delhi-a a chenna inah an kawm.

MP chuan Mizoram chhunga Myanmar atanga Mizoram unau raltlante atanga sorkar phal loh ruihtheihthil tawlh rukna leh sualna dang dang lo thleng thin chu pawl a tih thu leh hetiang thil a thlen tawh loh nana venpui turin leh thawhpui turin Chin Refugee Community te hi alo ngen a. Chin Refugee Community hruaitute pawn hetiang thil duhawm lo tak thleng thin chu pawl an tih thu leh, Mizorama raltlante chu lo zirchianga dan bawhchhe zawnga raltlante pawh an awm tawh lohna tura theih tawp chhuah an tum thu MP hi an hrilh bawh a ni.

Chin Refugee Community te hian India ram chhunga an harsatna tawh dan hrang hrang te MP hi an sawipui bawh a, MP hian an harsatna te lo zirchiang a, a tul dan anga hma lo lakpui a tum thu alo hrilh bawh a ni. Tunah hian Delhi khawpui chhung ringawt ah hian Chin raltlan hi mi 7,000 chuang an awm niin an sawi bawh.



PASTORAL CONF.

Zirtawpni atanga Mizoram Presbyterian Kohhran bial hrang hrangah bial inkhawmpui an tan chu zanin hian a tiak ang

Zirtawpni chhun lamah Finance Committee leh Nomination Committee an thu a, zanah Palai Lawmna bakah Report ngaihthlak a ni. Nimin khan rorel a ni a, nizan khan vantlang Pathian biak inkhawm hun hman a ni. Vawiin Pathianni chawhma leh chawhnu ah vantlang Pathian biak inkhawm hun hman a ni a. Chawhnu inkhawmah Lalpa Zanriah Sakramen theh a ni a. Zanin inkhawmah vantlang Pathian biak inkhawm ah bial chairman kalchhuak turte'n Sermon hnahnung an sawi ang. Pathian Biak Inkhawm hun hrang hrangah thupui sawi tura ruatten thuchah an sawi bawh a ni.

Inkhawmpui hman dan tur leh programme kimchang chu Bial Nomination committee-in an ngaihtuah thin a. Bial inkhawmpui hi April thla Pathianni vawi 4-naah hman thin a ni a, chutih rualin eng emaw rokhawlhna avanga hmang hma hret leh hmang tlai hret an awm bawh a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni.

Zanin dar 6 leh a chanve-ah Chanchinthar hi puan leh a ni ang.



LEAP

Lunglei district thuneitute hmalakna a Lunglei district-a vohbikte chawikanna tur ruahmanna - Project LEAP (Lunglei’s Empowerment for Access and Equity for all Persons) hnuaia April ni 22 aṭanga ni nimin inkar chhunga Lunglei Civil Hospital-a vohbikte tana hriselna dinhmun endikna thawh khatna buatsaih chu nimin khan a ṭiak.

He hun buatsaih chhung hian inentir mi 588 leh ALIMCO (Artificial Limbs Manufacturing Corporation of India) aṭanga a thlawna ṭanpuina hmanraw dawn tur dil mi 484 an awm. Project LEAP hnuaia vohbikte tana health assessment camp buatsaihah hian thiamna bik nei doctor hrang hrangte'n vohbikte hriselna dinhmun hi enfiahin, an dinhmun leh harsatna azirin Disability Certificate/Unique Disability ID (UDID) siamsak an ni a. Ni 5 chhung hian Lunglei Municipal Council (LMC) huam chhung aṭangin vohbik 553 leh LMC pawn lam aṭangin vohbik 35, an zavaiin vohbik 588 an inentir a ni.

Hemi chhung hian vohbik zinga za zela 40 chung lam harsatna (disability) nei, UDID nei tawhte leh upa kum 60 chung lamte tan ALIMCO te chuan ṭanpuina hmanraw chi hrang hrang - wheelchair, bengdar, mitdel tiang, zakdawh tiang leh hmanraw dangte dawng thei tur enfiahna hun an buatsaih nghal bawk a. Mi 484-in assessment camp chhung hian ṭanpuina hmanrua hi an dil a ni.

Project LEAP hma lakna hnuaiah hian vohbikte tana hriselna dinhmun endik hna hi Lunglei district chhung thingtlang khaw lamah te pawh la buatsaih chhunzawm zel tum a ni.



ZMP YOUTH

ZPM Thalai chuan an Sawrkar chuan kut hnathawktute tana ding a nihzia lantirin February ni 20 aṭang khan a thawhkhat na'n Sawhthing a lei ṭan a, Quintal 72,003 lei a nih hnuaa a thawh hnihna atan April ni 21 aṭangin Secondary Collection Centre hrang hrangah Sawhthing lei leh ṭan a ni, an ti.

ZPM thalai thuchhuah chuan Direct Purchase leh Auction hmanga Sawhthing lei hi a kalpui chhoh mek a nih thu an sawi a. Sawhthing lei thawh khatna-ah chhungkaw 7,689 atangin quintal 72,003 lei a nih thu an tarlang a. CM Pu Lalduhoma kaihhruai ZPM Sorkar-in kuthnathawktute dinchhuah na'na thlaithar leina tur Mizoram Budget a 'DAH' a ni hi ZPM Thalai Hqtrs chuan lawmawm an tih thu an sawi a. Banglam bik tura tiamtu ZPM chuan a insawi ang ngeiin kuthnathawktute thlaithar a lei ta ngei bawk a ni, an ti.

Kut hnathawktute tana ZPM Policy a hlawhtlin theihna tura rim taka theihtawp chhuah rengtu Agriculture Minister Pu Pc Vanlalruata, Adviser to CM Dr K.C Lalmalsawmzauva leh Agriculture Marketing Board Member zawng zawngte ZPM Thalai chuan an chhuan thu leh Zoram tana an hnathawh chu ropui an tih thu an tarlang bawk a ni.



ZORO

ZORO chuan Mizoram leh Myanmar a cheng Zofate inkalpawhna titawp zawng leh ramri hung tura sorkar laipui hmachhawp chu na zawka dodal an tum thu an sawi.

ZORO hruaitute hian chief minister Pu Lalduhoma chu a pisa-ah hmu-in zalen taka ramri a inkalpawh tawn theihna Free Movement Regime thiah chungchang leh India leh Myanmar inkar ramri hung tura sorkar laipui hmalakna chungchang leh pawl chhung hmalakna hrang hrang sawipui a ni. ZORO thuchhuahin a sawi danin India Sorkar-in Myanmar ramri a zalen taka inkalpawh theihna dan thiat a, ramri hung a tum mek chungchangah ramri hungna atan hian Mizoram sorkarin ram pe lo turin an ngen a. Zalen taka ramri kana inkalpawh theihna dan awm thin pawh a nihna anga dah let leh tura theih tawp chhuah turin ngen a nih thu an thuchhuah chuan a sawi a ni.

